

四庫全書

集部

欽定四庫全書

集部

竹澗集卷三

四

詳校官中書臣孫 溶

中書臣劉源溥覆勘

總校官知縣臣楊懋所

校對官助教臣胡平襄

謄錄監生臣馬步蟾

欽定四庫全書

竹澗集卷三

明 潘希曾 撰

古今詩一百十三首

郊祀分獻四瀆壇二首

丙子
歲

列炬薰天簇紫壇露華星彩溢虛寒五雲望切威嚴地
四瀆名叨奠獻官禮樂雍容三代盛精誠感格百神歡
遭逢未有涓埃報擬賦甘泉寓責難

寰區潤澤荷神功
登祀郊壇禮數崇
筐帛敬將從水色
四帛俱黑
篝燈高照切雲紅
石龕幽邃香烟表
碧殿玲瓏樹影中
對越再三分獻罷
格天一德仰宸衷

半隱王先生輓詞

以子純都御史受封

半隱先生本席珍
懶從三聘試經綸
此身已逐忘機鳥
有子還為瑞世麟
命服再膺榮晝錦
林泉終老遂天真
斜陽宰木今如許
賸有高風激後人

壽蒲菴王封君八十

子雲為嚴州守

白髮烏紗陸地仙逍遙心跡寄林泉蟠桃有待三千歲
甲子重過二十年閱世方瞳超色界長生靈藥在丹田
老萊膝下能兒戲更向黃堂啟壽筵

藍都憲生祠

仗鉞收秦隴成功歸廟廊金湯恩不淺俎豆報何長古
栢隆中廟甘棠召伯鄉封侯一時貴未許望宮牆

藍都憲凱旋卷

笳鼓動歡雷王師出塞回鷹揚元帥勇鼠竄衆兕椎露

布三秦曉風清萬里埃等閒尊俎地真有折衝才

送藍都憲陞南京刑侍

分陝勞開府留都詔促裝蘇公終式敬召伯孰能忘西
峙泰山重東流漢水長更懸天下望調鼎在巖廊

初遊醉翁亭次韓太卿庭方韻

久憶環滁勝登臨忽此亭席分溪石潤酒帶釀泉馨院
靜禽時語松深露晝零古人那可作聊誦壁間銘

遊琅琊寺不果次韻答曹少卿汝學

名山聞說好亭臺千里懷遊未果來空羨暮雲歸老衲
竟留中路憇蒼苔泉迷庶子清難濯嶺望磨施翠不開
寺有庶子泉磨施嶺
明日追陪了心賞輸君先我已三回

雪曉次韻

朝來寒氣透重衣雪壓茅簷半掩扉院落光生花滿樹
池塘清絕玉為磯舟橫西澗無人渡簾捲豐山斷鳥飛
竟日擁爐官事簡詩成高興轉崔巍

丙子冬至次韓信山韻

天地陽回又此辰。履長餘慶仰皇宸。年華滚滚波同逝。
官寺寥寥山作隣。凍合硯池從閣筆。暖生茶竈任添薪。
滁陽細酒堪消日。拭眼梅花對早春。

立冬日有懷京師諸友

東皇消息到江梅。鼓吹郊迎曉色開。五日新正渾醉裏。
百年殘夢又春來。他鄉綵燕隨緣看。何處雲鴻寄劄回。
料得故人多健在。尋芳聯轡滿金臺。

人日雪

入春二日逢人日占歲宜晴苦不晴凍雨作花還六出
終風吹冷竟三更羊羔薦酒渾多事蟹眼烹茶漸有聲
訪戴未能餘興在朗吟空對夕窓明

解舍梅久不開戲述

山城春到一旬強牆角官梅尚未香索笑幾回虛杜老
驚時今已負何郎空憐凍萼凝紅蠟安得南枝出靚粧
商鼎有須應忌早故舍元氣混羣芳

數日梅猶未開疊前韻

經冬相對意差強半
月東風未放香遠信不堪傳
驛使幽期如待探花郎
日斜籬落貪春睡月冷黃昏怯晚粧
為爾興懷懷作惱
強裁詩句答年芳

次韻曹霜厓梅開見寄

霜葩初見隔牆枝尚及新正未是遲
寒氣襲人朝夢破暗香牽興晚吟宜
情多怕弄風前笛病起思傾月下危
我屋一株仍冷葉却疑春色與君私

梅始開疊前韻

梅花照眼忽枝枝冠絕中園不論遲香遠自緣冰雪助
格高偏與水雲宜臨芳合有金聲賦送酒何慚玉液危
湖上孤山應更好偏舟終擬遂吾私

雨中梅花盛開

雪中留滯雨中開二月相逢是晚梅橫水一枝仍韻在
閉門終日忽春來眼憐冷艷移時立心醉幽香命酒陪
正恐陰雲妨月色不教踈影到亭臺

次日仍雨疊前韻

懷抱經春不自開
曉窓風雨正愁梅
香魂避濕應歸盡
粉艷驚吹易落來
鐵石廣平心故在
湖山和靖興難陪
陰晴等爾吾遊倦
為汝須登月下臺

次韻曹霜厓園梅為風所苦

寄語逋翁莫漫悲
風狂未損好花枝
芳宜送酒何愁落
香欲沾衣不憚吹
乍點宮粧憑小試
漸成閨味待深知
繁華擺落尤奇絕
月夕來看豫作期

遊琅琊

十里琅琊氣鬱葱峯回路轉興難窮禪房駕壑臨清泚
石磴梯雲到碧空鍾阜一卷烟靄外長江疋練渺茫中
千年帝子留奇觀多少遊人感慨同

壘前韻答曹霜厓

革裾幾度望青葱咫尺西隣眼欲窮拄杖竟妨春雨濕
談棋誰伴草堂空青山半落閒愁裏白日都消斷簡中
薄暮詩來天漸霽尚期歌詠一樽同

曹霜厓以詩謝茗并致佳酒次韻

春睡昏昏頗泥人叩門詩到日加辰愧無瓊玖償投李
賴有交游託飲醇餽茗敢誇陽羨勝分醅真出釀泉新
枯腸醉裏還堪潤月夕風晨此興均

即事

滁上烟巒翠繞城悠然相對轉愁生花枝幾樹初經眼
風雨連宵太薄情上國交游書久絕故園心事夢難成
等閒病起春過半曳履池邊看晚晴

春風

底事春風喜叫呶乍聞南陌忽東郊重茅捲去隨羊角
古木摧殘墮鵠巢料峭不禁輕酒力飄零餘恨付花梢
尋常少出愁吹倒多半韶光睡裏拋

即事四首

江北江南一望中便將遲早判春風江南二月桃開盡
江北梅花正作叢

梅花狼藉杏花開粧點山蕙送酒杯數日留連成底事
不知春色暗相催

每恨逢花易別離
不因雨打即風吹
亦知後會明年事
南北東西未可期

故人見夢話平生
醒後依稀不自明
高閣日斜消息斷
垂楊一樹語流鶯

南郭

南郭青山映草堂
兩年春夢落滌陽
空慚伯固新恩命
誤入歐公舊醉鄉
憂極江湖天渺渺
興闌花鳥雨茫茫
日長人靜惟危坐
消盡幽軒幾炷香

寄贈朱良矩改令丹陽

暫別仙班綰縣章泌陽暮月又丹陽恢恢餘地牛刀底
籍籍才名彌繡塲夜雨十年空夢寐暮雲千里益淒涼
江頭香草堪紉佩已覺流芳自此長

題太僕廨舍

官寺東頭數畝宮兩年棲息足帡幪白雲戶牖羣山合
綠水池塘曲徑通花木不殊吾土好茅茨猶有古人風
天涯吏隱惟迂拙滿壁題詩不務工

攜酒過曹霜厓即席次韻

經旬陰雨妨乘興此日壺觴徑欵門萬里風烟行處樂
幾年離合夢中論閒將象局消長晝漫逐鶯聲過小園
醉倒竹根應不惡明朝重到看生孫

次韻答韓信山

短鬢逢春不稱搔銜回聊免簿書勞詩償我債千篇少
樓羨君家百尺高敢謂杜陵渾漫興亦知王粲未為豪
來朝作意同登眺柳外花邊任所遭

遣興

好詩莫苦吟好棋莫貪著苦吟徒勞嘔出心爛柯祇為
貪棋錯詩以寫我情棋以撥我悶意匠心兵不自持斲
喪真淳起爭論君不見三千風月醉一生十九歧路誰
能明何如虛室坐終日一洗煩惱令神清孔刪義盡不
啻足超然且與吾心盟

花柳吟

飛花滿路春風香柳條弄日鵝兒黃如此風日亦可喜

趨逐兒女如顛狂花香欲與蘭爭馥柳黃漸似柘枝綠
為佩為梁自有真往往風流託空谷琅琊山椒一杯酒
坐我深春亦何負吁嗟此意空寂寥眼底紛紛醉花柳

曹亞卿第賞梨花

梨花盈盈雪一樹照日不消半含露香氣氤氳百和餘
隔牆暗逐東風度桃夭杏艷多名園春深狼藉空愁煩
醒心忽到池塘路疑是江梅初返魂休將一枝看帶雨
長門掩泣誰為主莫待溶溶月滿庭素娥心事尤孤苦

快哉君家今日晴釀泉之酒花邊傾更饒齒頰有張谷
夢回猶足消餘醒

次韻信山太卿重葺竹所

竹窓零落蒼苔合無復瀟湘風雨枝階下錦絅纔幾箇
憑君長養看猗猗

次韻韓太卿春晝見寄

一官閒散共天涯忽忽春風已落花不為綠苔憐踏破
杖藜終日話君家

春深二首

落紅無數委東流，狂盡楊花風亦休。
春色老來堪愛處，綠陰門巷似清秋。

喚歇鳩聲雨點，踈春陰漠漠。日長初曉，衙放罷都無事。
多讀山窓幾卷書。

次韻曹霜厓清明見寄

一春多夢竟難明，流水飛花傷客情。
脩禊亭荒觴未泛，登樓地僻賦初成。
狂風暴雨過寒食，野蔌山肴入夜烹。

珍重詩筒相慰藉此心惟合向君傾

與客嘗玉面狸次韻

敢誇野味少人知詩客曾題牛尾狸紅玉釘盤爭放筋
青錢沽酒共傳卮攜來江北春深日獵得山中雪霽時
正自思鄉緣爾劇未能歸去是誰為

栢子潭次霜厓韻

栢子成林俯碧潭天光澄徹鏡中涵千年勝地來遊晚
萬里塵容欲照慚雷雨震驚龍或躍江山題品我猶堪

高皇注天甘霖應長與滁人作美談

野景

野景向黃昏歸輿山復村鐘聲自雲寺酒旆綠楊門澗
遠流花片橋危合辭痕窅然迷處所回首憶桃源

示兒徽

望汝成人汝勉之汝家門地要支持箕裘不廢真吾子
學問仍須自得師早致青雲繩祖武莫將白日付兒嬉
終身有益惟謙約好為書紳慎勿遺

寄程甥文德

後嘉靖己丑進士及第兒徽同登

不多年紀好文章珍重吾家坦腹郎志篤尚須開萬卷
學成何止擅三場功名世濟方為孝冰玉人看亦有光
別後自嗟心力倦猶能刮目日相望

寄從子燧絅輩

千里題詩寄阿咸喜看蘭玉在階前力行孝弟光門闈
多讀詩書繼祖傳叔父龍鍾何足法爾曹豹變各爭先
相攜亦有東山興留滯天涯又兩年

遊花山

花山秀滁陽不在琅琊下空谷封白雲自昔遊者寡東風三月時牡丹映山赭我來屬春去殘枝綠瀟洒品色驗根荄采之忽盈把慇勤愧良朋行厨勸杯掌一笑各盡歡顧景不能捨歸輿倚微醺落日淨原野

次韻酬仲仁兄見寄

滁陽歲暮積離憂尺素俄傳自泰州咫尺不同遊宦地尋常空憶讀書樓泮芹香動春初采棣萼詩成夜自謳

却羨故園溪上月解分清影傍邗溝

泰州水名

紀夢

時伯兄家食東浙仲兄分教泰州予以太僕寓滁

兩年離別書仍斷三處相思夢忽通旅食不知滁泰遠追歡如在浙江東秋來祇負茱萸挿歲晚還期鴻鴈同自小翹翔予最後而今四十欲成翁

攜張嘉運遊醉翁亭

雨裏登山亦自奇古亭岑寂詰深危廿年離合誰能料一鉤陰晴未可期鳥喚白雲高木落僧歸青壁暮鍾遲

酒闌漫復聯鑣去明日秋風兩地思

九日孫主政莊登高

佳節驚心值異鄉登臨聊復過山莊茱萸共卜明年健
菊藥猶憚此日香野外行厨溪簌嫩雲端作戲舞衣涼
樊籠潦倒圖南意撫掌西風醉欲狂

寄贈張主簿銳兼柬吉大尹師召

遙憐寶婺鷺栖久忽覩金陵鴈信來膏澤賸遺桑梓福
轉輸仍足國家財酒醒淮浦西風冷詩到吳江落葉催

重掃縣齋應卧治長官今有魯恭才

醉翁亭次徐駕部子正韻

滁山偶為醉翁有終古亭臺屹不朽澗泉清淺碧玉流
石刻盤擎老蛟走巒迴樹翳日色遲仰視卓午忽已酉
吁嗟翁醉何時醒更上翁亭醉翁酒

晚菊

東籬細葉幾黃昏過却重陽開漸繁曉袂半沾和露采
吟杯初泛帶香吞娛情不減陶潛興惜晚難同杜甫論

短鬢經秋還耐否一枝簪罷手重捫

謝曹貳卿餽潤酒

門掩斜暉坐寂寥清樽分我潤泉遙不多殘菊猶堪賞
如許閒愁合得澆薄有宦情淹此日久無封事問明朝
銜杯好事論心地却恐高人不可招

采菊

采采躑躅滿把香曉筐攜得萬錢黃一杯淺泛仍和露
兩鬢斜簪半著霜陰處懸來蜂轉趁風前乾去蝶應傷

牀頭藥籠多收貯驗取仙家却老方

秋盡次韻曹貳卿見寄

一年草草又三秋古署風寒落木凋白鴈江南多日去
黃花雨裏幾時留悲深宋玉仍羈旅夢逐莊生亦繆悠
高調忽聞隣笛起倚欄賡罷自長謳

次韻曹貳卿病愈見寄

斷送三秋一雨中林端策策夜鳴風流年不管人間世
往事真成塞上翁病喜沈郎憐帶孔閒教杜甫憶鄖筒

東園笑語須相過未老黃花尚幾叢

聞雨

江雨生寒夜不眠初聞浙瀝轉連綿鄉心破碎踈桐底
病思淒涼斷鴈邊風急三更城迥隔官寺僻在城外草深四壁
地逾偏酒醒燈暗還多事占得新詩第幾聯

次韻曹貳卿食蟹

畢卓嗜蟹興莫當酒杯時自傾鵝黃金膏玉髓良足貴
殘甲敗戈非所傷風味十分七筋底縱橫幾許沙洲傍

城昏市遠不易覓詠爾徒和琳琅章

感事次曹霜厓韻二首

記得仙人教下棋應酬玄處在先知錯教費盡紅塵力
猶有臨終悔著時

江干歲晚衆芳殘閉戶經旬意鮮歡留得後園含翠栢
往來只合共君看

枕上作

窻涵殘月夜悠悠古木空山萬籟收身似虛舟橫野渡

夢憑欹枕到丹丘天邊鶴侶違經歲江上魚書動一秋
叨守閒官慚肉食擁衾無寐欲奚謀

次韻曹貳卿苦雪

閉門風雪卧終朝偶為詩筒弓興饒便欲訪朋千里去
寧知待伴幾時消寒深玉宇愁空闊病減清樽坐寂寥
舊隱半荒歸未得多情猶謝小山招

次韻曹貳卿長至見寄

官間贏得作詩忙凍墨朝來又幾行江國瞻天逢至日

酒杯娛客共年光
雪隨風散回晴景
冰帶泉澌落野塘
世事悠悠時序轉
細推消息意何長

送陳懷本

潤州高士說陳生
遠向滁山踏雪行
遊似馬遷真逸足
交因曹植有時名
同僚曹貳卿之友
琅琊故事堪重醉
西澗遺音又一鳴
明日歸舟俄興盡
暮雲回首大江橫

雙節為簡輔進士
庶母洎姊作

蒼松產徂徠
不知冰雪寒
砥柱中河流障彼
狂波瀾木

石何足道所貴全其天人雖萬物靈天性疇能全卓哉
二孀節秉志何貞堅母也矢靡他之子同辛艱莞莞弔
形影藁砧無時旋九死乃一生育孤紹家傳天道諒有
定未亡永餘年我歌柏舟詩千載世教宣

南莊八景為孫封君題八首

白雲洞口

深洞迴塵鞅閒雲鎖石扉采芝從此入愁濕薜蘿衣

活水源頭

地脉回滄海源頭鴻碧山滔滔長此水誰解洗塵顏

曲水流觴

久羨流觴事重尋曲水湄山靈應有約歲歲好花時

高峯飛翠

不快紅塵涴高峯獨杖藜惟來衫袖冷空翠落袍繩

絕頂雙泉

山泉清可愛絕頂日淙淙一派已奇甚飛來況復雙

小橋孤月

小橋橫斷澗扶醉往來輕日暮不歸去臨流弄月明

野寺歸僧

地偏隣古寺僧過偶相逢未了無生話深林咽暮鍾

古亭留客

千載歐翁醉遺文亦壯哉幾經亭下路留讀憩階苔

贈仲仁兄次韓曹二長官韻二首

憶弟看雲勞讀杜識人今日喜逢韓高歌白雪千金贈
增重青氈十載官祖道夕陽催別筆滌南山色擁征鞍

遙知泮水從容地幾度賡酬興未闌

流水何如別意長送君西澗感年光偶同風雨連宵話
竟負茱萸九日香

別時已近重陽

未老生涯期後樂相隨歸夢

苦難忘醉翁亭子琅琊景他日聊誇此願償

雪後與客登豐山

一冬垂盡日久雪乍晴時春入郊迎早光回野望竒御
風臨絕嶠乘興引深卮四座傾肝膈環滁在睫眉謝公
方縱屐鄭綮亦宜詩總是他鄉客閒園別墅棋真游起

物外此意許心知玉立千章栢冰堅百尺池徑欹緣石
磴雲冷護龍祠稍稍村烟動悠悠暝色欺僧局鍾罷寺
鴉集日斜枝歸卧山窓月虛寒尚夢思

栢堂雨露為京口曹少卿母賦

誓將蒼栢植秋堂誰料多年雨露瀼心苦暗期冰雪會
葉香高稱鳳雛翔昭回北極來恩誥酌盡中泠是壽觴
京口有中泠泉酒終古綱常還此母正須重詠栢舟章

畫紅菊

幽人風致絕塵寰
偃蹇蒼筠白石間
醉裏不知霜露冷
放教春色上酡顏

次韻曹霜崖催梅因憶舊廨梅花

當簷無復故枝垂
頗憶年時索笑奇
花向隣家須發早
春來此日未為遲
是日立春詩筒往復寧多事
羯鼓風流有所思
水畔亭臺煩豫掃
短筇行擬覓深卮

戊寅元日二首

旅食逢元日
日常朝憶舊班
四旬三又至
百歲幾曾閒
幸

際唐虞盛叨陪季孟間
讀書何事業翫悵厚吾顏
拙宦依淮海流年見戊寅
晴占雞日好春入蟻觴新歲
月輸誰手乾坤任此身官閒
城市遠察友自相親

畫馬

龍種何人為寫神空羣意氣絕風塵
略施羈勒愁難馭欲辨驪黃恐失真
十二天閑纔有幾三千駢牝總無倫
蹕雲追電爭常事看取鳴鸞曲水濱

二月於曹霜厓第觀瓶梅次韻

綺筵何處得江梅倒浸冰壺自可猜一種風流偏我愛
十分春色後時開樽前莫惜歌金縷笛裏仍愁點翠苔
竟日玩香薰弄影為君沉醉未能回

龍泉寺尋梅次曹霜崖韻

古寺林深別有春梅邊風日喜同巡行經曲澗聞香遠
興遶孤山得句新茶碗不煩供地主酒杯猶足醉花神
明朝有約臨東閣未厭陰何倡和頻

何寺丞第賞梅疊前催梅韻

牆頭細藥隔年垂
開向春深亦自奇
桃李行卑聊爾爾
冰霜性耐故遲遲
花晨暫覓閒中樂
月夕應添別後思
笑折一枝同浸酒
賞心分付暗香卮

紀夢絕句二首

客邸春風吹夢長
忽忽京闕又江鄉
浮生盡道如春夢
却笑浮生無此忙

推枕晴窓一欠伸
杏梢開到幾分春
天涯歲月成離索

翻媿追歡夢裏身

弔陽信馬貳守

同僚韓
卿外舅

宿草驚心歲月忙
人生不死是流芳
頻年宦轍甘棠在
一脉書香燕翼長
樽酒幾人思北海
門楣有客坦東床
全歸况復稀
年近蒿蘋徒勞道路傷

再題醉翁亭

澗水經春長綠波
林巒回合鳥聲多
山從公去名逾重
亭有時荒記不磨
仰止極知前輩盛
視今其柰後來何
官閒幸際升平世
此地尋常載酒過

夏至後苦雨四首

五月夏已至經旬風尚寒怨咨堪暑雨卑濕更江干小
市慵沽酒閒居恥素餐頤聞南北路二麥總艱難

江雨晴難得炎風鬱不宣濕蒸歲久藥潤透讀殘編避
漏移牀遍通明捲幔偏滌陽二年客入夏欠相便

天漏竟何如他鄉氣候殊身常親藥餌病不貸妻孥郡
介江淮僻城依草樹孤東華塵土夢回首渺川途

一雨夏將徂羈懷轉鬱紆山深變寒燠霧重失朝晡羲

御誰當挽雲師爾可誅林鳩太無賴相逐不相呼

南墩書院為宿州守徐良節題

精廬重構傍南墩鄉里衣冠重德門四面好山流翠近
百年喬木向春繁曾聞藜杖干星象賸貯芸香待子孫
今日無心雲出岫甘霖千里逐朱幡

九日對菊懷諸兄

往年九日菊未花今年九日花儘嘉霜前寒蕊重重好
滁山不把龍山誇反局官舍白日靜對汝悠悠兩形影

舉杯相醉還自酬花神醉未誰能省何處登高可披豁
茱萸更向花前掇不柰秋風生客愁鴈行吹斷江天闊

送何寺丞汝弘歸養

鄉邦文獻故通家京國過從幾歲華適意忽驚張翰去
承恩應作老萊誇錢塘水落帆風穩天姥雲深屐路賒
回首莫忘移孝念鵠書行促隴頭車

聞曹霜厓南旋小詩奉迓

故人分袂忽三秋報道南旋解我憂已會風雲瞻日表

却經桑梓繫蘭舟環滁山水仍相待

有石

恆石園亭莫久留

曹有石
假山園

古柏蒼苔舊公署近添雙鶴一呦呦

同僚有攜
鶴鹿至者

除夕

春入殘冬梅尚遲歲除今夕客纔知門前已見桃符換
燈下猶堪柏酒持三載地偏成斷梗九重天遠獨傾葵
生盆爆竹無心久漫逐兒嬉亦一奇

己卯元日次除夕韻

頗恆屠蘇到手遲流年輸與鬢毛知江湖寄迹舟常繫

勲業驚心鏡自持進德敢歌淇水竹憂時空愧魯園葵
半生漫浪詩千首如此男兒未是奇

次韻留別曹霜厓二首

幸託同官契三年一日如笑談更下榻出入每聯車吾
道終何補公才暫可儲難逢嗟易別莫放酒杯踈
風雨驚行色銜杯意渺如下江俄擊楫趨闕更膏車麗
句勞相贈空囊富所儲平生久要誼不為別離踈

疊前韻留別毛太卿二首

名德欽前輩行藏道自如共期川作楫獨喜蓋傾車伯
問書堪續梁公藥善儲公好薦藥分攜資誨語此意未應踈

世事故難料茲行信所如獨憐馳驛騎遙別看花車鄙
吝思常見才猷重夙儲滌陽好山色回首暮烟踈

宿遷道中大水

大水來天上平原匯百川離離波下黍汎汎樹頭船野
市迷崔鎮孤城浸宿遷流離愁此日何以禦來年

過泗亭

濟溢河奔漫泗亭官舟逆水阻脩程南風一夕開帆好

卧聽船頭軋浪聲

庚辰歲同仲實兄謁祖墓述懷

故里同過豈偶然郊行仍及立春前鶴原舊事追當日
馬鬣遺封望紫烟種秫有田堪客醉聚書充棟任兒傳
廿年南北知何補歸老深期了宿緣

謝盛希道先生枉顧

谷口高軒來故人清燈細雨一杯親江湖戀闊三千里

館署論文二十春乍見其驚忙裏鬢劇談如對夢中身
玉華千仞南溟上尚憶攀躋迹已陳

盛居玉華峯予嘗造焉

題王亞卿荆山別號卷

佳山堪住仍堪號名德巖巖復似之雲出會符霖雨望
林深真有棟梁姿平分海岱形逾勝變幻烟霞趣亦竒
未遂攀躋常仰止丹崖留墨定何時

沛縣黃河口南徙

河入沛已十年忽又徙徐

大河衝沛日湯湯十載清流眩眼黃忽徙彭城纔幾月

舊渠枯盡欲生桑

竹澗集卷三

欽定四庫全書

竹澗集卷四

明 潘希曾 撰

古今詩一百十二首

元宵戴揮使第呈席間諸君暨仲實兄

燈火今宵看故鄉
柳臺梅榭競春光
選來妙舞當筵久
翻得新腔按瑟狂
朋舊漫勞青眼待
弟兄私喜白眉良
有時投紱終同社
不把離愁攬醉腸

時將赴
南京

郊行呈仲實兄次前韻

偶尋幽事過南鄉照眼睛梅泛曉光故里不迷遊子望
中年翻憶少時狂垂綸未遂魚空羨緩轡相隨馬更良
義重平生堪屢別強膺常棣遣回腸

白閣為王太守壽夫題

秦中白閣號奇峯復有高人此託蹤玉骨峻嶒堪比德
雲衣變化竟從龍窻開霄漢琴書潤路出松篁杖屢重
青壁丹崖非易造幾回西望興還濃

太僕舊解

辛巳歲

兩年離此忽重來
門巷春深次第開
覆屋重茅新易瓦
臨池高檻舊登臺
笑談謾喜賓僚盛
南北徒驚歲月催
燕語梁間如識主
更將飛舞送餘杯

寄贈毛礪菴太卿

二年滌上漫追隨
綠水青山到處詩
同命遠將官事簡
歐亭頻過客情怡
有才未許長閒散
大拜真堪託保釐
慨我重來公已去
祇憑詩卷說相思

贈潘大叅伯和

憑將直道作生涯
磨涅無端玉不瑕
暫黜更為人望屬
超遷終荷帝心嘉
皂囊慷慨嘗焚草
金帶輝煌忽已花
千載風雲今日事
高歌茅拔為君誇

漫興二首

滁上羣山紫翠環
山中官府有無間
吾游倦矣情誰白
世事忙然鬢自班
楊柳春風村市迥
芙蓉秋水寺門閒
遙憐六一當年意
野鳥山僧共往還

莫向秋風歎索離。
環滁山水古今奇。
六年留戀有翁醉。
萬事蹉跎無我癡。
霜葉細飄紅冉冉。
晚禾將熟綠垂垂。
明朝試候南賓鴈。
帶得書來未可知。

江浦渡江

百里到江仍問程

是日發
滁州

江風初靜渡船輕。
乍穿蘆港

分秋影。
橫擲鯨波弄晚晴。
鍾阜日斜金碧炫。
石頭潮上水雲平。
千年王氣誰能鑿。
贏得秦淮繞帝城。

贈仲仁兄赴泰州

目斷鵠原鬢欲霜那知此會復滁陽鯉庭幼學年光逝
姜被秋同夜漏長歸夢漫隨賓鴈杳素餐聊取婢魚嘗
明朝驛柳仍愁折烟水吳陵正渺茫

送楊太卿介福歸武陵

翰苑論文忝後塵諫垣補袞復同寅重逢共訝憂時鬢
一疏堅辭報主身折柳滌亭堪此日藝蘭湘浦有餘
春武陵亦係東山望倘見漁人莫問津

酬沈侍御子公

斜日行臺古柏高
公餘清興獨揮毫
先聲風裁聞騁馬
出色詞華覩鳳毛
株守頻年惟我拙
萍蓬此地幾人豪
嚴裝見說朝天近
極目行塵首重搖

雨後寄題西廳童用中花園

芳園數畝舍西偏
雨霽春朝散步便
池水欲平新綠膩
花枝無語靚粧妍
相將鶯燕還
今日有待溪山更後賢
八載游歌雙鬢改
惟應青眼尚依然

同朱侍御子宜東郊餞客

城頭曉色艷新晴十里溪橋送客行花底四筵酬勸好
柳邊飛蓋往来輕平疇麥浪翻風綠深樹鶯簧隔水清
歸道不勞松下喝故應驄馬避前程

病中酬朱侍御見寄頗懷東郊之興

鶯花滿地風日晴伏枕尚憶東郊行醉裏不禁狂態劇
病來轉覺閒愁輕經旬無聊藥裹苦何日共話茶甌清
詩筒稠疊謝相憇賡和足課閒中程

嘗鮆魚次汪二卿天啟韻

兼程攜至已昏黃
命酒猶堪月下嘗
彭老骨多非所恨
西施乳膩恐難方
綠兼筍縷烹調美
紅點椒花七筋香
安得江頭看起網
百篇咀嚼老詩狂

次韻東峯二卿觀竹

杖履風流到竹園
不知春色去還存
繁華掃地誰為主
蒼翠臨池自長孫
鶴唳時隨清籟發
茶烟閒傍午陰屯
偶然乘興皆萍跡
戀此誰能詠謝墩

次韻汪東峯詠葵

露浥園葵夏景涼
綠陰深處艷紅藏
足能自衛如多智
心喜常傾祗向陽
吟筆好憑丹點鐵
舞筵休羨錦為裳
十年獻納同青瑣
對此還應各斷腸

夏日同僚小集

銜罷公庭一事無
官聯小集自相娛
槐陰落砌午無暑
棋局當軒日易晡
地散未妨甘吏隱
才踈何以副時須
流年又看端陽近
角黍蒲觴不負吾

憂旱

農人幸麥秋刈穫及未雨既刈天轉晴暫飽終恐餒盼
盼五月來赤地極千里哀哉無辜民為此旱魃苦露禱
良辛勤詎覩商羊舞作朝風雷發淋漓夕方止蹄涔乍
渺漫龜坼漸泥淖麻菽僅可播分秧尚無水三日雨不
繼杭稻知已矣豐山靈滌陽興雲恒自此下有柘潭龍
變化莫可擬冥冥果何意為惠不終始豈無溝洫利世
遠孰經理亦有桔槔功惰農棄不舉人謀或未減天乎
吾何籲素食愧官守對之空汗泚

贈陸侍御騰遠

陸以點
馬來滌

陸海才無敵滌山蓋偶傾龍蟠雲裏勅驄避道傍行
襟挹三江迴冰霜六月清經邦資數馬求友願遷鶯弔
古歐亭勝觀風范轡輕重聞西澗詠又動北轍情閔雨
方今日為霖待老成咨諭勞使節獻納重臺評愠解薰
風好行經梓里榮螭坳簪筆處翹首五雲晴

秋雨歎三首

旱來恨見秋霖遲淋漓浹月仍苦之禾焦豆萎已無救

壞屋決梁安用為生柴價高陳粟貴流離載道聞歎歎
莫怪農家賤賣牛待鋪欲給晨昏費

溪頭浩浩秋水生黑雲四幕雨未晴野蒿隨波田父泣
河鯽跋扈漁翁驚城中倉廩無餘積米舶初通過江客
乘潮逆浪來不時到市千錢論一石

雨中甘菊橫踈籬憐汝曾遭旱魃欺孤根得潤稍蘇息
嫩葉欲展仍離披汝時未來須汝待霜白秋清想風采
餘功尚賴延衰年何日枝頭看蓓蕾

仲仁兄陞魯府教授過滌詰別

九載黉宮道自尊曳裾今日又王門官清幸覩東平
樂祿薄聊供北海罇得句漫勞千里夢懷鄉空向此時
論楚天秋盡生離思鴈影參差雨氣昏

長春樓為休寧楊處士賦

休陽山水勝東南處士樓居倚蔚藍春占四時偏耐老
雲耕千畝不嫌貧門楣喜有金章客樽酒堪供玉麈談
好學郎君年更妙東書千里過江擔

壽邃庵楊閣老七十

黃閣歸來近十霜
稀年方進九霞觴
未應宰相山中久
已覺神仙世外長
筆底絲綸留禁署
胷中兵甲在遐方
梅花時節詩兼酒
江上重開綠野堂

壽王司訓八十

魯黃門
外舅

八十初分度康強
見幾人瞳方仍轉
碧髮短任垂銀半
子多朝貴諸郎有席珍
投來簪綬久瀟洒出風塵

發南京

留都兩月太常卿被召俄驚又北行一念寅清常對越
半生疎拙寡將迎龍江風水開帆好鳳闕星辰曳履
輕獨有月明回首夜石城鍾阜總離情

揚青道中夜泊

小泊空村待月行無端風浪夜還生舟人繫纜頻相喚
鈴卒巡更忽自驚天近神京偏浩蕩水通滄海却回榮
陰晴未卜朝來事間倚蓬窓看啟明

天津值雨

時南畿歲荒江南多
遏糴頗仰給北衆

滿地風沙麥正苗一番甘雨忽今朝土膏頓覺三春足
河潤誰誇九里遙南國救荒應有望幾州遏糴轉無聊
晚來喜劇還悲切兀坐船窓看長潮

赴召將至京二首

春明一別老滌山素食空添兩鬢斑新命忽傳天上
至孤蹤猶似夢中還身依日月逢更化職忝夷夔愧抑
班便合彈冠向明發五雲深處覲龍顏

燕山南面潞河東彩鷁歸來更得風三輔地形春日麗

九重天色曉雲紅入城未覺琴書累趨闕行看劔佩同
回首十年青瑣事不孤明主有愚忠

贈柏林吳封君

吳豐城人以子棋為都御史受封

豐城劔氣化為龍霧鬢霜鱗半倚空老去成林終苦節
後來作棟亦餘功人間歲月優游地天上栽培雨露中
見說鄉間評月旦古來徐孺可相同

送周太常璧安陸祭告

過雨離筵淨迎風使節輕皇華天上遣白雪郢中賡王

國稱殷禮朝廷託老成歸鞭須早著祀事日寅清

寄樸菴章都憲以道

二紀同年幾故人天涯蹤跡苦參辰閒愁誤遣霜侵鬢
渴想空疑月寫神再厯容臺慚忝竊宏開憲府仰經綸
何時一笑重逢地酒盞詩篇取次陳

送王都憲載卿巡撫四川

西南問俗付中丞才望如公簡帝心秋水落時川水
穩法星明處福星臨雪山增重應逾昔玉疊題詩又到

予與公

今萬里何時當報政聯班舊誼擬重尋

予與公

復清陳先生雙挽詞

先生善吟工草書長子
察為御史少寰為檢討

復清先生清絕倫讀書不走緇衣塵中年化去夢幻身

詩豪草聖全其真夫人未亡垂八旬堪與孟母為芳隣

兩郎成立俱要津含笑不愧黃泉人栢府冰霜翰苑春

麒麟瑞世何振振皇家郵典來方頗松楸千載恩光新

此歌遮莫徒傷神

次韻酬謝內翰以中仍期枉顧

高齋足秋雨幽興迴難親理悟床頭易香酣甕面春鄉
評今視昔世態假疑真何夕西城月清談共可人

再次前韻酬謝內翰

秋風驚逆旅鄉思正相親舟泛剡溪夜觴流曲水春幾
時尋舊約一笑道吾真大隱疑堪諉終憐紫陌人

題赤松山水圖贈雲南朱憲副子文

朱嘗著永川十三志

赤松山水擅吾鄉爭勝還聞有永陽我賴畫圖償夢想
君憑文字極揄揚烟橫秋歛重重碧花點春流曲曲香

携向天涯漫相贈滇雲燕月兩茫茫

壽謝母太孺人

板輿迢遞海東仙帝里恩光照壽筵天近重陽纔二
日人過七袞已三年菊花泛酒黃封好錦服趨庭絲戲
便一曲南山漫相祝可酬當日柏舟篇

送葉師道分教羅源

斯文自昔共心期豈謂先生獨後時千里馬難逢伯樂
五車書亦負男兒漫膺一命資模範遠赴三山惜別離

雨霽都門秋欲暮不堪攜酒暫追隨

次韻李學士夢弼會同年于隆禧寺四首

遊興逐羣仙秋林梵宇鮮蒲團閑獨坐莎徑偶同穿酒令難辭罰詩盟敢擅權分攜各無語已悟上乘禪
南郭赴幽期秋風動客悲半生一夢過萬事二毛知交久真情見官閒野性宜菊花遲亦好簪鬢莫教辭

僧房分半榻坐我白雲間暫脫浮生累聊娛此日閒露松垂砌濕霜蘚綴牆斑為謝良朋引從茲得往還

二紀同年友相逢幾度新鬢綠憂國改道貴任吾真飲
量開今雨遊踪避俗塵重尋曲江約屈指不多人

送陳尚德分教東鄉

朔風吹燕雲長空暗欲雪游子忽南旋衝寒過予別讀
書三十年偕計來上國闈闔遠九重二載紅塵陌一朝
領除書分教江右邑絳帳談舊經芹泮生春色平生經
濟志樂育聊自得蕭蕭都門柳搖落不堪折渺渺官河
舟尚及凍前發去住兩含情予亦江南客

東浦為汪太卿用之賦

東浦風流又到君西湖自昔遠塵氛橋通屐齒尋春去
寺報鐘聲隔水聞畫舫笙歌千頃月青山花鳥半窓雲
題詩不盡江鄉思此樂他年肯我分

甲申冬至

一陽初動又晨鐘朝罷楓宸日正紅閒事攬人方滾
滾殘冬辭我太匆匆冰霜勢重陰餘幾梅柳春遙意已
通多病年來常止酒試開涓滴待東風

朝天宮看梅呈崔蕭二光祿劉尚寶

見說尋梅高興生况逢三益翠同行蓬萊乍到乾坤別
姑射遙臨水月清信杳江南腸欲斷春回冀北眼偏明
一尊留戀歸來晚帶得幽香兩袖盈

送陳太常庠歸雲南

秋風高興落邱園謝事欣承帝語溫潛邱十年思舊
學歸途三錫荷殊恩滇池釣月逢溪友玉案尋春長
竹孫休羨漢家疏傅去祖筵今日盛都門

送楊太僕敬之赴滁

送君今日去憶我舊時遊山夾釀泉勝潮通西澗幽荒
亭閒載酒野渡自橫舟驥德驪黃外行看伯同收

贈南京秦司馬入為司徒

中外勲名三十年亨衢仍際中興天壯猷方叔初留後
相國蕭何復召還帆引龍江民望繫履聽鳳闕聖情
專擣材散地知何補南北追隨似有緣時予亦自南轉北

壽菊莊溫少叅先生

以子仁和為吏部右侍郎加封

恩命重沾八十初此身已乞廿年餘地曹舊借籌邊著
河省曾停泣罪車錦水一竿供晚釣菊花三徑傍雲鋤
可應老去渾忘世離鳳迴翔在禁廬

荆溪張處士挽詞

其子大輪為
刑部郎中

斯文託同郡側聞長者風結屋荆溪上讀書白雲中至
孝出天性哀感神明通折梅供靈几花發實作叢况復
羣行懿鄉間仰遺蹤義方篤庭訓桂子奮時庸尚憶十
載前尊酒親德容胡為一轉盼宿草迷堂封我歌薤露

詞濺淚揮秋空

荅樸菴章都憲

時章在濟
理漕河

叩門誰述故人書三復欣然伏枕餘河洛禹功方有賴
東南民力竟何如時清不覺衰年及別久那堪萬事疎
太白樓頭聞駐節暮雲千里轉愁予

題董千里孝思卷

有序

昔韓文公作董生行生祥下瑞在狗乳雞哺
間道其實也汪太史間齋修實錄凡以馴兎

產芝稱孝感者皆削不書獨喜蘭谿董千里能篤於孝為賦詩美之蓋韓公意也嗟乎董氏垂千年而孝子之見於歌頌者再焉豈易得哉特次太史氏韻以播其事云

董生純孝有天知又見雲孫起孝思誰似昌黎書瑞應尋常雞犬勝靈芝

督軍南贛過草萍驛

草萍過我已三回四壁留題半雜苔霧散曉村紅樹出

雲歸晴岫翠屏開州連衢信雄東浙路繞岡巒接上台
一掃塵氛天萬里清風應逐使旌來

酬高吾陳院長宗禹

歲暮倚高閣山水興遐思翩翩南翔鴈尺書忽見貽美
人湖東雲為霖方濟時書傳陽春曲三歎音有遺顧慚
駕駘質長途浪追隨尚幸託宿契著鞭敢後期

丙戌元日贛州作

城東晴旭入新年水秀山明壯古虔闢下達來初作

鎮樓頭高坐獨籌邊光陰太向詩書欠塵俗還兼薄領
纏漫把椒觴酬令節春風從此動江天

元宵即事簡陳院長

皎月放春晴元宵坐贛城管絃傳鬧市燈火徹深更野
曠狼烽熄鄉違鶴怨生不逢南浦客碧草遠含情時陳在南浦

次前韻

佳期積雨晴燈月爛春城獨酌同民樂長吟任僕更江

湖一念在時序二毛生莫弄梅花笛東風易薄情

南來

南來未覺遠回首渺西江白髮生朝鏡青燈坐夜窓乾
坤心獨苦老大氣難降何日五湖路扁舟蕩槳雙

特恩堂為陳院長賦

陳湖廣武陵人

謝病當年疏累陳豫期勿藥寵偏新暫歸五柳先生
宅竟起東山宰相身江漢恩波元浩蕩武陵地望正嶙
峋高堂巨扁相輝處仰止應多善頌人

三月三日

花枝狼藉鳥綿蠻又是春風三月天蠶簡字訛時自校
獸爐香細午初然賞心何處臨流飲歸計無端對雨眠
章貢合流開府地滔滔終日不知年

即事

兩日東園不暇窺綠芽頓發老槐枝葵榴吐葉已初夏
蘭蕙含蕤更此時千古往來川上歎幾人夢覺枕邊炊
輕繩短筭方宜我且復掀髯一詠詩

贈盛程齋年兄赴南京兼簡二三同年

信息遙聞一月前
眼穿行旆嶺南天
相逢不盡平生話
後會仍留何處緣
世路悠悠雙短鬢
晨星落落幾同年
金陵詩友重盟社
莫惜連篇向我傳

次韻酬陳院長登滕王閣見寄二首

老我登高欠此樓
羨公乘興及清秋
尚餘文字三王後
三王謂勃
緒仲舒不盡江湖萬里愁
極浦風來樵笛起
危城日落賈帆收
却憐章貢遙相匯
一路民風託共諷

綠波芳草恨堪論
高閣難期共一尊
何處江山如此好
古來題刻至今存
花隨流水春環砌
鴈度寒雲夜呌闇
自是好遊心尚壯
不知秋鬢點霜痕

冬夜漫興二首

一燈深坐不知寒
分閫天涯歲又殘
部曲夜間刁斗靜
衙門地僻簿書寬
曾聞樽俎能全勝
敢謂干戈可久安
獨苦此心誰共語
每憑封事達朝端

嶺畔冬深亦乍寒
江風吹雨夜闌珊
不聞鴈信來千里

空愧鱗符絆一官睡少正須茶
破悶病餘那用酒為歡
古槐衰柳方搖落時復蕭蕭打畫欄

讀書漫成

白晝沉簿領不暇拈詩書愛茲冬夜永一編聊卷舒孤
燈閃青焰細字迷魯魚揩眼徒自苦掩卷一長吁幼學
不知要涉獵事文辭去道日以遠古人安可期驅馳二
紀來五十知昨非勤事乃吾職讀書固其餘嘗聞仕優
學糟粕非所須不如靜中悟默坐松窓虛

憫贛市火

深院夜寂寥漏下已二鼓遙聞市聲喧起視出庭戶烟
焰俄漲空乘風恣翔舞回祿殃我民倉卒愧為主下令
速諸司奔走胥救護撤屋開火道縛缶競相助移時火
幸熄焦爛良已苦吾聞天降災失政由官府赤子却何
辜啼號靡寧宇恨無帡幪力為爾奠焦土

贈陳都閩汝玉

閥閱承三世聲名重一時畧書凡幾賜節鎮亦頻移

志在吾儒事功收大將旗伏波終豐鎬未老莫辭衰

喜雪二首

越雪由來罕清晨忽滿墀二年初快覩三白敢深期日
午消還盡簷陰凍欲垂民飢方待哺翻恨麥秋遲

昨雪已難得今朝仍亂零遠山頭再白久客眼偏青瘴
退梅花嶺寒疑翡翠屏還同在京日呵凍寫蘭亭

遣興

世事竟何憑寒宵睡未能候茶聊附火拋卷懶親燈興

共青山遠年隨白髮增班超玉門願應有尺書騰

陳院長城新縣有作輒次韻

窮鄉荆棘已多年此日金湯更可憐澤及釜魚春水活
功收刀犧夏畦便谿山頓改乾坤舊風氣還看楚粵連
容易敢談疆理事吾聞定計十年前

次韻答陳院長紀行見寄

樓船西上路逶迤兩岸江風颭畫旗民俗正勞千里問
年華休歎二毛知肇開山邑綏無賴半減田租慰阻飢

老我提兵思按堵喜沾餘潤和新辭

程甥文德詠雪見寄次韻四首

故園今歲雪飄洒幾昏明近得詩相報遙憐興獨清綬
梅橫凍影墮竹起虛聲五嶺應難見千山空復情

城上北山雪曾驚雙眼明年來鄉信杳夢見旅魂清遍
覆元含垢潛滋不動聲無勞添髮白猿鶴久馳情

憶昔雙溪雪通宵似月明樓臨瓊島淨人在玉壺清渚
鷺迷寒影江猿咽曉聲當時謝庭詠自足慰親情

金匱已正卷之三
卷四
我屋蒼筠下窓涵積雪明映書寒亦好烹茗味偏清夜
凍懸冰柱晴融滴雨聲宦遊逾二紀念此不勝情

贛州春日

歲事峥嵘春又來東郊鼓吹踏塵迴送寒已碎黃牛土
隨俗聊嘗綠蟻杯萬里乾坤同化日一時城市動歡雷
流年不為人久待兩見梅花傍嶺開

退食

退食行臺日欲晡門扃蒼柏一塵無鳳團煮茗閒吟好

龍掛燃香夜坐孤萬卷懶開從插架八州遙鎮自披圖
虛糜館穀天涯晚未有涓埃翊廟謨

除夜

空堂蠟炬輝獨坐睡何遲兩歲平分夜三更欲盡時聲
殘爆竹火香入頌花詩好辦明朝起山呼祝聖慈

丁亥元日

去年此日憶龍顏天上初違侍從班浪迹至今千里
外山呼徒自五更還乾坤開泰心同壯梅柳回春鬢獨

斑十載微痾欣頓愈著鞭隨地敢辭艱

元宵即事

燈月交輝夜春城沸管絃栢臺深鎖鑰梅嶺接風烟不
語坐三鼓回頭來二年太平多氣象萬里仰堯天

詠蘭四首

蘭蕙一類而蘭特少其香特勝開謝之早晚
遲速亦異予於贛之行臺並植之

山人遺我蘭百里到城邑采之千仞崖故土帶砂礫瓦

盆及時裁風雨相潤色空階白日靜綠葉光嶷嶷
猗蘭含紫蕤經冬凍不發春風幾何時碧幹爭挺拔一
幹僅一花清香乃傾國貞姿頗耐久逾月未衰落
蕙本蘭之族氣味亦相似一幹五七花生香春夏際復
有閩中產葉高而稍膩誰書本草經誤以零陵視
古人多佩蘭貴有君子德况為王者香尼父興歎息芳
名播終古俗眼常罕識高齋風日和相對余心懌

夏夜四首

夜窓無暑栢陰森湘簾閒眠獨枕琴嶺畔不知天許遠
還將北斗看升沉

一雨猶餘幾日涼不知三伏在炎方晚來風起秋偏早
却為尊鱸憶故鄉

滿天風露夜將分花樹生香隔院聞獨坐此時無一語
待他日出漫云云

四壁蟲聲一院花銀河淺淡月西斜此時此景清於水
不動薰風也自嘉

贈陽明王公督軍兩廣

有序

陽明先生大節出險大功錫封天下想望

其風采而其得之心無待於外者則雖士大夫或莫知之也先生家居數年詔起視師

蒼梧道贛江幸奉顏誨以慰閑別敬贈鄙句

一封書奏險夷輕百戰功歸帶礪世道更為今日起
心傳獨得古人精稽山峻絕雲難躡贛水迢遙蓋偶傾
早定南荒報天子太平調燮待阿衡

過濟贈仲仁兄

有序

予昔督軍江右比還朝兩道濟寧予兄栢
軒先生為滋陽王傅得兩會焉喜論心而
惜分手賦此奉贈

濟上今春喜再逢蘭舟暫繫詰萍蹤君顏自保丹常渥
我鬢偏憐雪漸濃鴻鴈去來俱漫浪墳篳唱和未從容
清時共擬涓埃報三徑終期杖屨從

濟寧逢春二首

忽忽浮生已向衰悠悠拙宦竟何裨碧山笑我紅塵久
青鏡輸誰白髮遲治水可能尋禹迹轉漕亦復託蕭規
夢遊不覺長安遠應被春風昨夜吹

鼓樂迎春東郭東春風遙與故園通一時諸友誰常健
三洞雙溪我欲窮官事敢云無了日古人堪慕有高風
泰山咫尺須乘興會見扶桑海日紅

北山茶

春來遙憶北山茶青壁丹崖傍我家采露擷烟空夢寐

沿河汎濟自年華求閒會了三生願知足何須七碗加
燕語鶯啼春送盡又看光景到萱花

嘗筍

濟上初叅玉板禪尋常罕見轉堪憐藥欄夜出驚雷早
茶碗晨供帶露鮮貢到冰船知幾日賜靄金闕憶當
年艷諳世味還何慕只有從來水竹緣

春日寫懷二首

半世浮名夢未醒他鄉春色眼猶青自從河濟收功後

贏得餘閒點內經

衰病辭官本自宜
慰留有肯敢言私濟州
官柳沿河綠又見春風此度吹

東園漫興

花發東園偶獨窺
山禽相對語移時
天涯形影青春伴
晚節功名白髮知
何處
覓裘還待老
他年竹帛亦虛垂
杖藜緩步防苔滑
筋力深嗟病後衰

南司馬王公以詩留別輒次韻

浚川舊同館

翰苑文章同舊價
南都山水屬真仙
相看轉覺雙瞳碧
漸老難回兩鬢玄
酒興總非方壯日
花時猶是未歸年
陽春強和憑誰寄
塞鴈依稀隔暮烟

初夏即事懷友人

客舍春歸不待余
薰風相欵竟何如
綿蠻到處鶯求友
來去無時燕卜居
日色漸長堪曬藥
衙門多暇慣抄書
故人千里應相憶
試向河頭覓鯉魚

壽婺源補齋潘先生

有序

先生前福建憲僉澹翁之子予莫逆交也懷
玉弗售放志林壑箕裘之緒付之諸子今年
秋既被封命仲子薦叔尋擢福建憲副典
文教焉予惟先生得之過庭者有以遺後其
不得行于時者乃於薦叔兄弟發之可謂賢
且難矣賦韻語一章為先生壽

三十年前憶盍簪郎君相見喜腰金鯉庭詩禮流風遠
菜彩趨承愛日深紫誥迴鸞榮寵錫丹崖舞鶴伴閒

吟秋來好飲黃花酒莫遣繁霜兩鬢侵

辛卯立春日即事

共喜新年見立春雪花呈瑞復茲辰梅梢半著交加重
麥隴平鋪頃刻勻吟對物華川上興飲開涓滴病餘身
二毛錯遣侵雙鬢欲謝塵緣葆我真

濟寧聞召命寫懷

爐中藥物篋中書未足功夫歲暗徂日月人間渾少暇
風雲天上復相須身猶抱病慚康濟年已知非強進趨

三載白樓嘗一過

樓在濟寧
南城上

不堪臨別却踟蹰

得徽子書走筆答之

兒子書來勸我歸不堪衰病尚依違

謂依違
兒書

幸逢明主

真難報得謝清時會有幾六月又頒南國筭三春空老

北山薇欲知退食委蛇地禁柳垂城轉夕暉

時居皇城
西牆下



竹澗集卷四